

摘藻堂四庫全書薈要

史部

欽定四庫全書薈要

史部

御批通鑑綱目卷四十二下

詳校官編修臣汪鏞

欽定四庫全書薈要卷七千三百五十九

史部

御批資治通鑑綱目卷四十二下

丁未景龍元年春二月復崇恩廟

(雜)

東

武

氏

崇恩廟及吳陵順陵因名鄴王廟曰褒德陵曰

先又制崇恩廟齋郎取五品子充太常博士楊孚

曰太廟皆取七品以下子為齋郎今崇恩廟取五品

子未知太廟當如何上令太廟亦準崇恩廟孚曰以

臣準君猶為僭逆況以君準臣乎上乃止右補闕權

若訥上疏曰天地日月等字皆則天能事賊臣敬暉

等輕紊前規請復存之以光孝理又神龍制書並依

貞觀故事豈可近捨母儀遠尊祖德疏奏

手制褒美尋敕自今奏事不得言中興

集覽

鄴王

后父

御批通鑑綱目

二

韋玄貞尋封鄴王齋郎屬兩京郊社署共一百二十人掌供郊禘之後禮部奏補太廟以五品以上子孫及六品職事併清官子為之六考而滿郊社以六品職事官子為之八考而滿皆讀兩經粗通限年十五以上二十以下擇儀狀端正無疾者充祭享而員少兼取三館學生更一番者戶部下蠲符歲一申考如論語及一大經中第者錄奏吏部注名籍散官否者番上如初六試而出授散官天地日月等字注見嗣聖六年改質實吳陵順陵武氏尊考為太皇造十二字

發明

武氏為李氏婦而滅唐宗廟惟恐不及中宗為唐子孫而復武氏廟亦惟恐不及據事直

書義自見矣雖然遂我者出納我者死此衛子鮮之所可以議衛衍者也中宗廢於武氏擯斥幾死而崇之獎之恩意有加復於五王而貶之殺之不啻仇敵勸沮若此其及宜矣非不幸也

三月吐蕃遣使入貢質實

吐蕃西羌屬名注見太宗貞觀八年

○夏六月

朔日食質實

日食注見新莽天鳳元年

○秋七月太子重俊起兵誅

武三思武崇訓兵潰而死考異

按凡例用兵於臣子之僭叛者曰討得其罪人

曰誅此起兵討賊而未得其罪人但當書討誤作誅

皇太后以太子重俊非其所生惡之武三思尤忌太子上官婕妤以三思故每下制敕推尊武氏駙馬武崇訓又教安樂公主請廢太子太子積不能平與李多祚等矯制發羽林兵三百餘人殺三思崇訓于其第又使成王千里分兵守宮城諸門太子與多祚斬關而入叩閤索上官婕妤上乃與韋后安樂公主上官婕妤登立武門樓以避之宮闈令楊思勗擊斬多祚前鋒多祚軍奪氣上俯謂多祚所將千騎曰汝輩皆

朕宿衛之士何為從多祚反苟能斬反者勿患不富貴於是千騎斬多祚等餘衆皆潰千里攻延明門將殺宗楚客紀處訥不克而死太子亦為左右所殺上以其首獻太廟及祭三思崇訓之柩然後梟之朝堂官屬不敢近永和縣丞竇嘉勗號哭解衣裹之坐貶上以思勗為銀青光祿大夫行內常侍安樂公主請以崇訓墓為陵給事中盧粲駁之公主怒出粲為陳州刺史襄邑尉席豫聞公主求為太女歎曰梅福譏切王氏獨何人哉乃上書請立太子言甚深切太平公主欲表為諫官豫恥之逃去胡氏曰衛蒯瞶欲殺南子至於出奔春秋罪之重俊則又甚矣多祚無外庭大臣廢昏立明之策獨舉禁兵以子脇父其事逆矣既殺三思欲遂中止其可得乎為多祚者於重俊之請拒之可也不知春秋之義陷於誅死不亦傷乎○安樂公主及兵部尚書宗楚客謀使侍御史冉祖雍等誣奏相王及太平公主云與重俊通謀上使御

史中丞蕭至忠鞠之至忠泣曰陛下不能容一弟一妹而使入羅織害之乎相王昔為皇嗣固請以天下讓陛下累日不食陛下奈何疑之上素友愛事遂寢右補闕吳兢上疏曰相王同氣至親六合無貳而賊臣日夜連謀乃欲陷之極法夫任以權則雖疎必重奪其勢則雖親必輕自古委信異姓猜忌骨肉以覆國亡家者幾何人矣况國家枝葉無幾陛下登極未久而一子以弄兵受誅一子以愆違遠竄惟餘一弟朝夕左右尺寸布斗粟之譏不可不慎青蠅之詩集覽良可畏也相王寬厚恭謹安恬好讓故免於難

集覽

千騎初太宗選官戶及蕃口驍勇者著虎文衣跨豹文韉從遊獵於馬前射禽獸謂之百騎則天時增為千騎隸左右羽林中宗增為萬騎梅福譏切王氏漢成帝時大將軍王鳳等專朝梅福上書譏切之按譏切猶言誚責也崩殯欲殺南子崩殯春秋衛靈公太子也南子靈公夫人也左傳定十四年崩殯欲殺南

子不果奔宋蒯苦恠反曠五恠反羅織網羅無辜織
成反狀也青蠅小雅詩刺幽王也營營青蠅文公集
傳曰營營往來飛聲亂人聽也青蠅汙穢能變白黑
詩人以王好聽諛言故以青蠅飛聲比之而戒王以
勿聽質實一統志云永和縣本漢河東郡狐誦縣地
魏始置永和縣晉屬平陽郡後魏罷北齊
也狐誦城置臨河郡及臨河縣隋初罷郡改縣曰永
和屬隰州唐初移治仙芝谷置東和州貞觀中州罷
以縣屬隰州宋金元俱仍舊本朝因之改屬平陽府
盧桀幽州人陳州注見周赧王三十七年襄邑縣名
注見漢順帝陽嘉二年席豫襄陽人蕭至忠蘭陵人
陛下注見漢光武建武二十七年吳兢汴州浚儀人
尺布斗粟之譏事
在漢文帝八年

書法

漢據書反此則曷為不以反書江充既死太
子方發中廐車載射士出武庫兵發衛卒是

真反矣若重俊者迫於三思崇訓之謀且方是時
二武之強又非可以徒手取也綱目於重俊書起
兵而三思崇訓
書誅權衡審矣

發明

天子在上太子無故稱兵何不反書之三
思崇訓濁亂宮闈罪惡貫盈將危社稷重俊

不忍憤憤之心起而戮之故綱目書起兵書誅所
以正三思崇訓之罪爾若夫兵潰而死天固不使
中宗得有其子也

帝后並加尊號

皇后帥王公上表加帝號曰應天神龍皇帝宗楚客
又帥百官表請加皇后為順天翊聖皇后上並許之
書法前書羣臣上皇帝皇后尊號此則曷為以自
加為文譏不在下也帝后一體皇后而表加

帝號是欲羣臣之尊已也帝而許皇后之加號是自加也故雖宗楚客之請不書綱目之意微矣

貶魏元忠為務川尉道卒

元忠以武三思擅權意常憤鬱及太子重俊起兵遇元忠子太僕少卿升於永安門脇以自隨太子死升為亂兵所殺元忠揚言曰元惡已死雖鼎鑊何傷但惜太子隕沒耳宗楚客等共誣元忠云與太子通謀請夷三族制不許元忠懼表請致仕楚客等又使御史中丞姚廷筠劾之貶渠州司馬又令給事中冉祖雍奏元忠不應佐州楊再思李嶠及御史袁守一皆贊之乃貶務川尉行至涪陵而卒胡氏曰當元忠被召之時三思擅權五王受制韋后內亂妖妄肆行事可知矣元忠聞之逡巡不至上也一見新君慶其復位密進忠益稱病而退次也亟就相位依違取容名節盡墮而終亦不免可以為知進而不知退者之戒

矣質實

渠州注見晉懷帝永嘉五年宕渠一統志云務川禹貢荊州流裔春秋戰國屬楚為黔中

地秦屬黔中郡漢為武陵郡地後周屬清江郡隋置務川縣屬庸州尋廢庸州以縣屬巴東郡唐初置務州治務川縣貞觀中改為思州天寶初改為寧夷郡乾元初復為思州宋改為羈縻州政和中復改思州宣和間罷紹興初復置元置思州軍民安撫司至元間改為宣撫司隸湖廣行省本朝為思南府隸貴州布政司涪陵縣名注見晉惠帝太安二年

九月以蕭至忠宗楚客紀處訥同三品于惟謙罷

至忠上疏曰恩倖者止可富之金帛不可以公器為私用今列位已廣于求未厭陛下數降不貲之澤近戚有無涯之請賣官鬻法公違憲章徒忝官曹無益時用上不聽

質實

不貲之澤注見漢順帝永

建二年不
訾之身

僧慧範有罪削其階爵

慧範為銀青光祿大夫上庸公於東都作大像府庫
為之虛耗上及韋后皆重之無敢指目者侍御史魏
傳弓發其姦賊四十餘萬請寘極法上欲宥之傳弓
曰刑賞國之大事陛下賞已妄加宜宜刑所不及上
乃削黜慧範放于家宦官薛簡等恃寵犯法傳弓奏
請誅之御史大夫竇從一懼固止之時宦官用事從
一為雍州見訟者質實上庸縣名注見周赧王十一
無鬚必曲加承接質實年東都注見秦莊襄王元年
三州雍州注見玄宗
開元十一年京兆

書法

僧罪非謀反作亂不書此何以書重階爵也
慧範一僧耳階銀青光祿爵上庸公濫莫甚

於此矣故因其
有罪特書之

以楊再思為中書令韋巨源紀處訥為侍中○改羽林

千騎為萬騎質實

羽林衛名注見漢安帝延光四年

○殺習藝館內教

蘇安恒

安恒矜高好奇太子誅武三思
安恒語人曰此我之謀也故及

書法

安恒掠名取禍其以無罪書殺何病中宗也
帝未復位安恒一再言人所難可謂有功於

帝矣就使果聞此謀猶將宥之實有功而無報虛
得罪而受誅是帝之愛三思甚於愛身也故書殺

之病

冬十二月朔日食○遣使詣江淮贖生考異

據漢延熹八年書左

館之苦縣此
詣字當作之

中書舍人李入諫曰江南鄉人採捕為業魚鱉之利
黎元所資江湖生育無限府庫供支易殫與其拯物
豈若憂人且鬻生之徒唯利斯視錢刀日至網罟年
滋施之一朝營之百倍未若回救贖之錢物減貧無
之徭賦活國愛
人其福勝彼
集覽 錢刀漢食貨志貨寶於金利於
刀索隱曰有契刀錯刀契刀長
二寸直五百錯刀以黃金錯直五千
其形如刀故名曰刀以其利於人也

書法

譏非事也是故點兵書遣
使贖生書遣使皆譏之

戊申二年春二月赦

宮中言皇后衣笥裙上有五色雲起上令圖以示百
官侍中韋巨源請布之天下從之仍赦天下迦葉志
忠奏昔神堯未受命天下歌桃李子文皇未受命天
下歌秦王破陣樂則天未受命天下歌娥媚娘皇后
未受命天下歌桑條韋謹上桑條韋歌十二篇請編
之樂府皇后祀先蠶則奏之太常卿鄭愔又引而申
之上悅皆集覽娥媚娘曲名也娥固甫反太宗始召
受厚賞武后為才人既見賜號娥媚永徽後
民皆歌娥媚娘曲桑條韋永徽末質實祀先蠶注見
里歌有桑條韋也女條韋也樂高宗上元二
年

三月朔方總管張仁愿築三受降城

初朔方軍與突厥以河為境時默啜悉衆西擊突騎
施仁愿請乘虛奪取漠南地於河北築三受降城首

尾相應以絕其南寇之路六旬而成以拂雲祠為中
城距東西城各四百餘里皆據津要於牛頭朝那山
北置烽候千八百所自是突厥不敢度山畋牧減鎮
兵數萬人仁愿建城不置壅門守具或問之仁愿曰
兵貴進取寇至當併力出戰回首望城者斬之安用
守備生其退恐之心也其後常元楷為總管始築壅
門人以是重仁集覽三受降城中城南直朔方西城
愿而輕元楷南直靈武東城南直榆林其北
皆大磧也按輿地要覽東城本漢雲中郡在榆林縣
東北八里中城本秦九原郡地在榆林西城在今豐
州西北八十里拂雲祠朔方郡與突厥以河為界北
厓有拂雲祠突厥每犯塞必先謁祠禱解然後料兵
度而南也牛頭山名也在白登之北質實朔方郡名
天山之東朝那注見漢文帝十四年質實注見漢武
帝元朔元年一統志云三受降城乃唐張仁愿所築
東受降城在大同府城西五百里廢東勝州東北八

里本漢雲中郡地寰宇記云此城東南至朔州四百里西至中受降城三百里中受降城在大同府城西北五百里本漢九原縣地唐貞觀初立雲中都督府後置橫塞軍遠置雲內州舊領雲川柔眼二縣元省入州西受降城在大同府城西北四百三十里古豐州西北八十里烽候注見齊高帝建元四年烽燧

書法

赭圻斥溫譏專也此書張仁愿何予功也美惡不嫌同辭

夏四月置修文館學士

置修文館學士選公卿善為文者李嶠等二十餘人為之陪侍遊宴賦詩屬和使上官昭容第其甲乙於是天下靡然爭以文華相尚

集覽

上官昭容上官復姓也名婉兒昭容

婦官名也
九嬪之一

書法

以學士名官
始見于此

秋七月以張仁愿同三品○始用斜封墨敕除官

安樂長寧公主上官婕妤好皆依勢用事請謁受賕降
墨敕除官斜封付中書時人謂之斜封官其員外同
正試攝檢校判知官凡數千人婕妤好立外第出入無
節朝士往往從之遊處以求進達安樂公主尤驕橫
宰相以下多出其門奪民田作定昆池延袤數里以
上好擊毬灑油以築毬場上及皇后公主多營佛寺
左拾遺辛替否上疏曰臣聞古之建官員不必備故
士有完行家有廉節朝廷有餘俸百姓有餘食今陛
下百倍行賞十倍增官使府庫空竭流品混淆陛下
又以愛女之故竭人之力費人之財奪人之家愛數
子而取三怨使戰士不盡力朝士不盡忠人既散矣
獨提所愛何所歸乎君以人為本本固則邦寧邦寧

則陛下之夫婦母子長相保矣若以造寺必為理體
養人不足經邦緩其所急急其所緩親未來而疎見
在失真實而冀虛無一旦風塵再擾霜電荐臻沙彌
不可操干戈寺塔不足攘饑饉臣竊惜之疏奏不省
時斜封官皆不由兩省而授兩省莫敢執奏吏部員
外郎李朝隱前後執破一千四百餘人怨謗紛然朝
隱一無所顧清源尉呂元泰亦上疏諫造寺曰邊境
未寧轉輸疲弊而營建佛寺勞費無極昔堯舜禹湯
文武惟以儉約仁義立德垂名晉宋以降塔廟競起
而喪亂相繼由其好尚失所人不堪命故也伏願回
營造之資供疆場之費使烽燧永息羣生
富庶則如來慈悲平等之心孰過於此
試攝檢校判知官此皆出於特旨所置以待資淺之
人員外一曰員外置謂員數之外別置者也同正一
曰同正員謂與正員資格同也有試某官攝某官檢
校某官判某司事知某事者其名類不一皆非本制

定昆池欲以勝昆明池故名定昆池明皇雜錄曰定者言可抗訂之也朝野僉載云池方四十九里直抵南山愛數子而取三怨數子謂安樂公主長寧公主及皇后妹郾國夫人上官婕妤好等三怨謂竭人力費人財奪人家也沙彌釋氏要覽曰沙彌僧始落髮後之稱華言為息慈謂安息在慈悲之地也善見律云沙彌雖未具戒質實兩省謂中書省門下省也張九韶曰省禁署也漢書云舊名禁亦入比丘數

中避元后諱故改名省中饑饉注見隋煬帝大業十二年疆場注見漢靈帝建寧二年烽燧注見齊高帝

建元四年

冬十一月突騎施犯塞遣將軍牛師獎將兵討之考異

討當作擊

突騎施烏質勒卒子娑葛自立為可汗故將闕啜忠
節不服數相攻擊總管郭元振奏追忠節入朝宿衛
忠節行至播僊城經畧使周以悌說之曰國家不愛
高官顯爵以待君者以君有部落之衆故也今脫身
入朝一老胡耳豈惟不能保寵祿死生亦制於人手
今宰相宗楚客紀處訥用事不若厚賂二公請留不
行發安西兵及引吐蕃以擊娑葛求阿史那獻為可
汗以招十姓使郭虔瓘發拔汗那兵以自助既不失
部落又得報仇比於入朝豈可同日語哉虔瓘時為
西邊將忠節然其言遣間使賂楚客處訥如以悌之
策元振聞其謀上疏曰往歲吐蕃所以犯邊正為求
十姓四鎮之地不獲故耳比以國多內難故且屈志
請和其心豈能忘十姓四鎮哉今如忠節之計恐四
鎮危機將從此始吐蕃得志則忠節在其掌握豈得
復事唐也往年吐蕃無恩於中國猶欲求地今若有
功請分于闐疎勒不知何以抑之是以古之智者皆

不願受夷狄之惠蓋預憂其求請無厭終為後患故也阿史那獻父叔兄弟皆嘗立為可汗使招十姓卒不能致尋自破滅何則此屬非有過人之才雖復可汗舊種衆心終不親附况獻又疏遠於其父兄乎虔

瓘前此已嘗與忠節擅入拔汗那發兵不能得其片甲匹馬徒致侵擾今此行必不能得志徒與敵結隙令四鎮不安實為非計楚客等不從遣馮嘉賓持節安撫忠節侍御史呂守素處置四鎮以將軍牛師獎為安西副都護發甘涼兵兼徵吐蕃以討娑葛忠節逆嘉賓於討舒河口娑葛遣兵襲之生擒忠節殺嘉賓守

集覽

拔汗那即寧遠國古烏縣國也拔一作鏹並音跋于闐注見漢武帝元狩元年疎勒

注同上元鼎二年甘涼甘漢張掖郡涼漢武威郡皆在河西本匈奴休屠王地按五代晉高居誨使于闐記自靈州過黃河行三十里始涉沙自此沙行四百餘里登沙嶺度白亭河至涼州自涼州西行五百里

至甘質實安西郡名注見高宗永淳元年十姓西突厥部落名注見嗣聖十三年間使注見漢

武帝元狩元年四鎮注見高宗調露元年甘涼二州名甘注見晉安帝隆安元年張掖涼注見漢光武建

武十年
武威

安樂公主適武延秀考異安上漏以字

武崇訓之弟延秀美姿儀善歌舞集覽安樂公主適公主悅之崇訓死遂以延秀尚焉武延秀源流

至論曰唐史例曰某人尚公主今綱目例不曰尚而曰公主適某人此所以明人倫也

書法

公主下嫁書以許與行不同時則不書以止書適前適武崇訓不書此其書何瀆倫也先

是主以崇訓弟延秀美悅之崇訓死因以尚焉其悖不通問之禮久矣書適延秀譏之也

發明

公主適延秀者言以則出於上命不言以則公主自適之也夫延秀乃崇訓之弟公主先適崇訓則於延秀為嫂氏今崇訓誅死未幾公主悅延秀而適之則是知有男女而不知有嫂叔是亦匹鳥之不若爾書法如此既已著安樂淫奔之醜又以病中宗不父之惡也

徵武攸緒入朝

召武攸緒於嵩山敕禮官於兩儀殿設位行問道之禮令攸緒以山服見不名不拜攸緒至趨立辭見班中再拜而退屢加寵錫皆辭不受親貴謁候寒溫之外不交一言起居舍人武平一亦表請抑損外戚權寵不敢斥言韋氏但請抑損已家優制不許太平安樂公主各樹朋黨更相譖毀上謂平一曰親貴多不

輯睦以何法和之平一以為宜斥逐姦險集覽山服
抑慈存嚴示以知禁無令積惡上不能用居士

野人之衣服起居舍人掌記錄天子言動以修紀事
之史百官志起居舍人二人隨宰相入殿若仗在紫

宸內閣則夾香案分立殿下直第二質實嵩山注見
螭首和墨濡筆皆即坳處時號螭頭嗣聖十二

年兩儀殿未詳處
所武平一太原人

書法

自武德以來非外蕃未有書入朝者書攸緒
何錄賢也攸緒於是三見綱目矣賢之故詳

書之

牛師獎與突騎施戰敗沒遂赦娑葛立為可汗

牛師獎與娑葛戰敗沒娑葛遂陷安西斷四鎮路遣
使上表求宗楚客頭楚客又奏以周以悌代郭元振

遣阿史那獻討娑葛娑葛遺元振書稱我與唐初無惡但宗尚書受闕啜金欲枉破奴部落又聞史獻欲來恐徒擾軍州未有寧日乞大使商量處置元振奏娑葛書楚客怒奏元振有異圖召將罪之元振遣子具奏其狀乞留定西土以悌竟坐流白州復質實白以元振代之赦娑葛罪冊為十四姓可汗

注見高祖武德五年可汗夷狄君長號注見漢後主景耀四年

書法

前書犯塞書討之是可罪也於是於是一戰而敗遂即赦之且立為十四姓可汗唐之失馭甚

矣故特書遂遂遼辭也

以婕妤上官氏為昭容

書法

昭容不書書上官氏何譏寵過也斬關叩閤之變帝曾不戒而又甚焉

○名王公近臣入閣守歲

名王公近臣入閣守歲酒酣上謂御史大夫竇從一
曰聞卿久無伉儷今夕為卿成禮從一拜謝俄而內
侍引燭籠步障金縷羅扇其後有人衣禮衣花釵令
與從一對坐却扇易服乃皇后老乳母王氏本蠻婢
也上與侍臣大笑詔封菖國夫人嫁為從一妻俗謂
乳母之壻曰阿奢從一每進表狀自稱翊聖皇后阿
奢欣然有集覽步障晉王愷作紫絲布步障石崇作
自負之色集覽錦步障王凝之妻謝氏施青綾步障
自蔽與賓客談議按步障今罍罍是也以小竹交結
為之衣以布或帛可舒可卷阿奢奢之奢反吳人呼
父曰質實伉儷注見太宗貞觀十五年宮
奢國注見漢獻帝建安二年宮縣

己酉三年春正月幸玄武門觀宮女拔河考異帝幸上漏

幸玄武門與近臣觀宮女拔河又命宮女為市肆公
御為商旅與之交易因為忿爭言辭褻慢上與后臨
觀為樂上每與近臣宴集令各效伎藝以為樂國子
司業郭山惲獨歌鹿鳴蟋蟀明日賜山惲敕嘉美之
又嘗宴侍臣使各為迴波辭諫議大夫李景伯曰迴
波爾持酒卮微臣職在箴規侍宴既過三爵諠譁竊
恐非儀上不悅蕭至忠曰此真諫官也嘗幸定昆池
命從官賦詩黃門侍郎李日知詩曰所願斲思居者
逸勿使時集覽拔河戲名也景文龍館記曰清明節
稱作者勞以大麻絙兩頭繫千餘小繩數人執
之爭挽以力弱者為輸又晏公類要曰以麻絙巨竹
分朋而挽水謂之拔河以定勝負而祈農桑也拔音
跋鹿鳴詩小雅篇山惲意取和樂且湛謂樂不可甚
也蟋蟀詩唐風篇山惲意取好樂無荒謂樂不可淫
也三爵注見漢正誤郭山惲獨歌鹿鳴今按湛者樂
後主建興十年之久也中宗每與近臣宴集令

各效伎藝以為樂故山憚歌鹿鳴等詩以諷之蓋取
示我周行視民不忮等義安得又取和樂且湛一語
以勸質實李景伯邢州栢仁人懷
遠之子李日知滎陽人

三月以韋巨源楊再思為左右僕射同三品宗楚客為
中書令蕭至忠為侍中韋嗣立同三品崔湜趙彥昭同
平章事

監察御史崔琬對仗彈宗楚客紀處訥潛通戎狄受
其貨賂致生邊患故事大臣被彈俯僂趨出立於朝
堂待罪至是楚客更忿怒作色自陳忠鯁為琬所誣
上竟不窮問命琬與楚客結為兄弟以和解之時人
謂之和事天子崔湜通於上官昭容故引以為相時
政出多門濫官充溢人以為三無坐處謂宰相御史

及員外官也韋嗣立上疏以為比造寺極多所費千萬人力勞弊怨嗟盈路佛教要在降伏身心豈在窮極侈麗萬一水旱為災戎狄構患雖龍象如雲將何救哉又國初食封之家不過三二十今乃百有餘家凡用六十萬丁為絹百二十萬匹今太府庸調絹歲不過百萬國家租賦不及私門之半封戶之物諸家自徵僮僕依勢陵轢州縣不若悉計丁輸之太府使封家於左藏受之又員外置官數倍正闕典吏困於祇承倉庫竭於資奉又京官有犯方遣刺州選人衰耄方補縣令以此理人何由率化望自今應除三省兩臺及五品以上清望官皆先於刺史縣令中選用則天下理矣監察御史宋務光亦以於時食實封者凡一百四十餘家應出封戶者凡五十四州皆割上腴之田而太平安樂公主又取高貲多丁者刻剝過苦應充封戶者甚於征後滑州地出綾緞人多趨射尤受其弊人多流亡請分封戶配餘州並附租庸每

年送納上集覽對仗仗注見高宗永徽五年俯僂趨
皆不聽出俯低頭僂曲背也俯僂趨出敬畏

之甚質實庸調注見高祖武德七年左藏注見代宗
也大歷十四年三省注見宗文帝元嘉三十

年兩臺謂中臺外臺也張九韶曰官舍之重者曰臺
蓋取嚴肅尊崇之義滑州注見隋恭帝皇泰二年

以韋溫鄭愔同三品

溫后
兄也

夏五月流鄭愔於吉州貶崔湜江州司馬考異江上漏
為字

崔湜鄭愔俱掌銓衡傾附勢要賊賄狼藉選法大質
壞御史斯恒李尚隱對仗彈之下獄流貶遠州

實吉州注見晉安帝元興元年安成江州注見晉明
帝太寧二年潯陽銓衡注見晉哀帝興寧二年狼

藉注見僖宗

乾符五年

楊再思卒○秋七月突騎施娑葛遣使請降

賜名
守忠

八月以李嶠同三品韋安石為侍中蕭至忠為中書令

○九月以蘇瓌為僕射同三品質實

僕射官名注見秦
始皇三十四年

○冬十一月祀南郊

上將祀南郊國子祭酒祝欽明司業郭山惲建言古
者大祭祀后裸獻以瑤爵皇后當助祭天地太常博
士唐紹蔣欽緒以為周禮惟有助祭先王先公無助
祭天地之文侍中韋巨源請依欽明議上乃以皇后

為亞獻仍以宰相女為齋娘助執豆籩大赦齋娘有
壻者皆遷官流人放還均州刺史譙王重福獨不得
歸乃上表自陳曰陛下焚柴展禮郊祀上玄蒼生並
得赦除赤子偏加擯棄天下之人為臣流涕況陛下
慈念豈不愍臣集覽后裸獻以瑤爵裸音灌禮大宗
恟惶表奏不報伯以肆獻裸享先王注云獻獻
醴謂薦血腥也裸之言灌也灌以鬱鬯謂始獻尸求
神時也瑤玉也疏云王出迎牲入豚解而腥之薦於
神坐以玉爵酌醴齊以獻尸后亦以玉爵酌醴齊以
獻尸也齋娘齋戒潔也五行志曰以婦人為齋娘以
祭祀之服執質實唐紹京兆人臨之孫蔣欽緒萊州
事近服妖也膠水人豆籩祭器名注見漢明帝
永平元年均州注見晉元帝建武元年武當譙王重
福譙州名注見漢獻帝建安十五年譙邑重福中宗
之子陛下注見漢光武建武二十七年
焚柴展禮注見漢章帝元和二年柴告

豆盧欽望卒。○以唐休璟同三品

休璟年八十
餘進取彌銳

關中饑

關中米斗百錢運山東江淮穀輸京師牛死什八九
羣臣多請幸東都韋后家本杜陵不樂東還使巫覡
以不利東行說上後有言者上質實關中注見玄宗
怒曰豈有逐糧天子邪乃止

兆京師注見周顯王二十五年東都注見秦莊襄王
元年三川杜陵縣名注見漢元帝初平元年巫覡注

見漢隱帝
乾祐三年

庚戌四年
睿宗皇帝
春正月上觀燈於市里考異上當作帝

上與韋后微行縱宮女
數千人出遊多不歸者

書法

凡觀譏也觀燈譏之甚也於市里又甚
矣綱目書觀燈二是年玄宗開元元年

上御梨園考異

上當作帝

命三品以上拋毬拔河韋巨源唐休璟衰老集覽
隨絙踣地不能興上及皇后妃主臨觀大笑居
登反大質實梨園注見玄
繩也宗開元二年

夏四月幸隆慶池

初武后之世長安城東民家井溢浸成大池數十頃
號隆慶池相王子五王列第於其北望氣者言常鬱
鬱有帝王氣比日尤盛集覽厭之厭益涉反穰也當
上幸池宴侍臣以厭之也漢高本紀東遊以厭

之質實

長安城注見隋煬帝大業十三年一統志云隆慶池在西安府城東

五月宴近臣

國子祭酒祝欽明自請作八風舞搖頭轉目備諸醜態欽明素以儒學著名盧藏用曰祝公五經掃地盡

矣質實

八風舞注見新莽始建國二年八風臺

書法

書譏也綱目書宴十有七詳漢高帝五年自是以下皆譏也

發明

善不積不足以成名惡不積不足以滅身中宗自復位以來于今六載凡見於綱目所書

者畧無一善可紀故夫信聽晨北則女禍復作尊寵三思則武氏再振貶黜譙王則愛子不保竄殺五王則功臣受禍擢用方士則妖人得志崇獎僧道則異端恣橫公主開府則女謁盛行員外置官

則爵位濫冗殺戮諫士則忠言路絕斜封拜官則
賕賂紛紜甚至書名近臣守歲書觀宮女拔河書
觀燈於市里若猶未也書御梨園書幸隆慶池書
宴近臣極矣餅中進毒身且不保天醜其為禍出
不測固其理之必至者觀綱目先後所書則中宗
之禍咸其自取初無足恤向非太宗德澤在人未
泯則唐之滅亡必矣夫其所以極情淫逸者不過
欲取樂而已而不知禍機伏於其中然後知古之
帝王兢兢業業不邇聲色者非惡逸樂而好憂勤
也中外奠安社稷鞏固所謂莫大之樂蓋自憂勤
中得之豈必恣情極意而後為樂哉後之有天下
國家者監中宗之所以失體帝王之所以得其庶
乎矣

六月皇后韋氏弑帝於神龍殿以裴談張錫同三品張

嘉福岑義崔湜同平章事立溫王重茂考異

按纂試例曰以毒弑

者加進毒字而不地據分注后與安樂公主合謀於餒餅中進毒中宗崩則此條韋氏下漏進毒二字帝下於神龍殿四字當削去

初定州人郎岌上言韋后宗楚客將為逆亂后殺之許州參軍燕欽融復上言皇后淫亂干預國政宗楚客圖危社稷上面詰之欽融抗言不撓楚客矯制撲殺之上意怏怏由是后及其黨始懼散騎常侍馬秦客光祿少卿楊均皆幸於后恐事泄安樂公主亦欲后臨朝以已為皇太女乃相與合謀於餅餒中進毒中宗崩范氏曰易姤之初六曰繫于金柅貞吉有攸往見凶羸豕孚蹢躅陰柔之始以剛制之則吉縱之以往則凶若羸豕之孚無時而自止也夫女子小人放而不制必至於弑父與君而後已是以聖人戒之

中宗一怏怏不悅而其身已不保雖欲制之其可得乎○韋氏秘不發喪召宰相入禁中徵諸府兵屯京城以裴談張錫同三品張嘉福岑義崔湜同平章事太平公主與上官昭容謀草遺制立溫王重茂為太子皇后知政事相王旦參謀政事宗楚客曰相王於皇后嫂叔不通問聽朝之際何以為禮遂帥諸宰相表請罷相王政事乃發喪皇后攝政改元唐隆太子即位年十六宗楚客葉靜能與諸韋勸后遵武后故事以韋氏子弟領南北軍楚客等上書稱韋氏宜草唐命謀害少帝深忌相王及太平公主密與韋溫安樂公主**集覽**郎岌姓名岌逆及反易始之初六曰係謀去之**集覽**于金柅貞吉有攸往見凶羸豕孚蹢躅柅乃履反又女紀反羸劣隨反躅直益反躅直錄反伊川先生傳曰姤陰始生而將長之卦一陰生則長而漸盛陰長則陽消小人道長也制之當於其微而未盛之時柅止車之物金為之堅彊之至也止之以

金柅而又係之止之固也使不得進則陽剛貞正之道吉也使之進往則漸盛而害於陽是見凶也羸豕孚蹢躅聖人重為之戒言陰雖甚微不可忽也豕陰躁之物故以為况羸弱之豕雖未能強猛然其中心在乎蹢躅蹢躅跳躑也陰微而在下可謂羸矣然其中心常在乎消陽也君子小人異道小人雖微弱之時未嘗無害君子之心質實神龍殿注見太宗貞觀防於微則無能為矣十七年太極殿定州注見周威烈王二十三年中山許州注見漢後主建興十年許昌社稷注見新莽天鳳元年詔之注見明宗長興元年詔之無狀怏怏注見漢光武建武二年禁中注見宋孝武帝大明六年溫王重茂溫縣名注見周赧王二十九年

重茂中宗之子

書法

中宗復位以來殊無一善可紀者嬖縱韋氏唐至再亂不保其身宜矣。五人之相也孰

以之書以於弑帝之下則以之者韋氏也然則五
人之為逆黨也明矣重茂不書迎即位何不予韋
氏之得立君也不予其
立故其廢也斥名之

發明

呂氏亂漢平勃討之殄滅無遺故終西漢世
無復女禍武氏亂唐五王討之失賊不誅故

未幾即有韋氏之亂然則禍根亂本可不深鋤而
痛絕之哉雖然中宗之禍宗楚客馬秦客楊均安
樂公主輩皆與聞乎故而獨歸惡韋氏何也中宗
寵信豔妻淫而不制楚客輩雖為逆黨要皆出於
韋氏是以綱目獨書于冊則見中宗不能防閑帷
箔貽禍自己而韋氏陰柔浸長卒肆大逆所以推
原禍始正其本也或曰裴談張錫張嘉福岑義崔
湜初不預謀反書於弑君之下何也曰此正書法
之深意所以誅賊亂之黨孤元惡爾此五人者儻
能稍知大義必不從弑君之賊而受其職故不書

宗楚客等所以著禍本之所自起而特書裴談等所以治黨賊者之罪立法若此其為後世戒豈不深切著明也哉

臨淄王隆基起兵討韋氏并其黨皆伏誅隆基為平王以鍾紹京劉幽求參知機務李日知同三品蕭至忠等貶官有差考異為上漏自字是時中宗被弑睿宗未即位隆基封平王非自為而何尹氏發明謂上書討韋氏著其撥亂之績故此恕其自為之罪然昭烈自立為漢中王以宗室繼絕未嘗恕其自立之罪也

相王子臨淄王隆基罷潞州別駕在京師陰聚才勇之士密謀匡復初太宗選官戶及蕃口驍勇者著虎

凡天星皆有定數若史冊所紀星隕頗多甚至亂落如雪果爾則星之殘缺不可勝數矣何至今猶燦然如故耶興等必流星

文衣跨豹文韜謂之百騎武后時增為千騎隸左右羽林中宗謂之萬騎置使以領之隆基皆厚結其豪傑會兵部侍郎崔日用以楚客謀告隆基乃與太平公主及公主子薛崇陳苑總監鍾紹京尚衣奉御王崇暉前朝邑尉劉幽求折衝麻嗣宗謀先事誅之會韋播數榜捶萬騎萬騎皆怨果毅葛福順陳玄禮見隆基訴之隆基諷以誅諸韋皆踴躍自效或謂隆基當啟相王隆基曰我曹為此以徇社稷事成福歸於王不成以身死不以累王也且萬一不從將敗大計遂不啟微服與幽求等入苑中逮夜天星散落如雪幽求曰天意若此時不可失於是福順直入羽林營斬諸韋典兵者以徇曰韋后醜殺先帝謀危社稷今夕當共誅之立相王以安天下敢有懷兩端助逆黨者罪及三族羽林士皆欣然聽命隆基勒兵入玄武門諸衛兵皆應之斬韋后及安樂公主武延秀上官昭容幽求曰衆約今夕共立相王何不早定隆基止

過度以爲隕落也

之比曉內外皆定隆基乃出見相王叩頭謝不先白
之罪相王曰社稷宗廟不墜於地汝之力也遂迎相
王入輔少帝閉城門收捕諸韋親黨及宗楚客晉卿
紀處訥趙履溫張嘉福馬秦客楊均葉靜能等皆斬
之屍韋后於市諸韋襁褓兒無免者封隆基爲平王
押左右廂萬騎賜崇賧爵立節王以紹京守中書侍
郎幽求守中書舍人並叅知機務武氏宗屬誅竄殆
盡以李日知鍾紹京並同三品隆基二奴王毛仲李
守德皆起拜將軍諸宰相蕭至忠等貶官有差胡氏
曰殲殄諸韋懲五王之不斷也誅竄諸武懲中宗之
失刑也然撥亂反正之道必拔本而塞源徒治其末
則未有不復爲患者縱不復爲患亦不厭人心拂天
理矣當是時也若能條陳禍亂原本起自武后黜其
號罷其享以庶人禮葬絕之于祖宗其猶足以救中
宗五王之失而垂女主禍亂之戒也乎雖曰禮無臣
子貶尊上之文然武氏所爲爲天下大變天理所無

也必睿宗有所不忍則大臣以道正國者召會百集
官告于高祖太宗之廟而行之為法受惡可也

覽

韋將先反馬鞍具也榜捶並笞擊也榜音彭字或
從手五王敬暉桓彥範張柬之袁恕已崔玄暉神

龍元年嘗舉

質實

臨淄縣名注見楚義帝元年潞州
注見周赧王五十三年上黨別駕

兵討諸武

官名注見宋文帝元嘉二十八年崔日用滑州人鍾

紹京頓州人繇十世孫朝邑縣名注見隋煬帝大業

十三年折衝官名注見漢成帝綏和二年羽林衛名
注見漢安帝延光四年果毅官名注見太宗貞觀十

年罪及三族注見秦二世二年襁褓注見漢殤
帝建平元年立節縣名注見嗣聖八年義豐

書法

書為平王何隆基自王也然則五人之相也
又孰以之隆基以之也首書為王繼書以某

其然後下書相王即位隆基之心可見矣

發明

分注載封隆基為平王而綱目不書其封若隆基之自為平王者何也臨淄始馬舉事不

白相王既誅韋氏遲回久之考之前史蓋自六月庚子至甲辰首尾五日必待劉幽求力言始請相王即位是以先儒謂臨淄本意蓋欲自取此即綱目書法之意也然則何不以為平王書之曰臨淄削平內難興復唐室社稷之不泯實嘉賴之故綱目上書臨淄起兵討韋氏既以著其撥亂之績故下書隆基為平王所以恕其自為之罪也嗚呼綱目之立法如此則其急於討亂厚於待人為何如哉此君子所以有取乎綱目也此君子所以有樂乎綱目也

相王旦即位廢重茂復為溫王

劉幽求言於隆基請相王早即位以鎮天下遂以少帝制傳位相王時少帝猶在御座太平公主進曰天

下之心已歸相王此非兒座遂提下之睿宗即位以
少帝為溫王置於內宅胡氏曰臨淄舉事不白相王
韋氏既誅復拒幽求之議然則其志本欲自取特不
敢言耳惜乎睿宗之不見幾幽求之不知變也韋氏
淆亂睿宗曾無討除之意而隆基能之大事已定幽
求宜請於相王使以神器歸之臨淄則太平之亂無
自而生矣他日聞變登樓然後畀付父子之間質實
交有所損幽求勇能戡亂而智不燭微惜哉

相州名注

見漢元帝建昭二年魏

郡神器注

見漢光武建武六年

書法

重茂嘗立矣斥名之何不成之為君也終綱
目廢不書主者三梁蕭正德蕭淵明唐重茂

皆立不
以正也

以鍾紹京為中書令尋罷之

紹京嘗為司農錄事既典朝政縱情賞罰衆皆惡之
太常少卿薛稷言於上曰紹京雖有勲勞素無才德
出自胥徒超居元宰恐失聖集覽出自胥徒薛稷傳
朝具瞻之美出為蜀州刺史
周禮胥徒注此民給徭役者若今衛士也胥讀如誦
謂其有才知為什長故一胥十徒也誦思敏反具瞻
之美詩民具爾瞻義取大質實蜀州注見宋文帝
臣助君行化人皆瞻之也元嘉九年崇慶

書法

書尋罷之何美從諫也書尋罷之始此尋罷
之辭二有幸之之辭有惜之之辭以鍾紹

京為中書令是年詔大將軍鄭光賜莊免稅後宣
宗大中六年唐以宋齊丘知尚書省五代壬寅年
皆幸之也以李谿同平章事昭宗乾寧
元年惜之也終綱目拜官書尋罷之四

立平王隆基為太子考異

太上漏

考證

當加皇字於太
子之上○謹按

明皇平韋氏之亂睿宗即位欲立太子以宋王成器嫡長久不決宋王辭以死不居平王上睿宗從之先儒有言善哉宋王之讓曰時平則先嫡長世難則先有功此萬世不易之論也曰斯言也宋王所言因事處變一時之權也司馬公曰立嫡以長禮之正也范氏曰太子者君之貳父之統也立子以長不以功所以重先君之世也二公立言垂教斯所謂萬世不易之大經然宋王之志泰伯之志也泰伯不逃則王季不得立宋王不讓則明皇不得為太子明皇舉事時其志將以自取也至於內外皆定天下歸心不得已迎睿宗其於父兄之間有慙德焉若宋王如隱太子而不避則開元治亂又未可知也觀其專事娛樂未嘗及時政長枕大衾非明皇素友愛也宋王有以啟之耳然則宋王亦無得而稱乎

上將立太子以宋王成器嫡長平王隆基有功疑不能決成器辭曰國家安則先嫡長危則先有功苟違

其宜四海失望臣死不敢居平王之上劉幽求曰除天下之禍者當享天下之福平王拯社稷之危救君親之難論功語德實實宋王成器宋州名注見漢景無可疑者上從之帝三年梁國成器睿宗長子平王隆基平州名注見秦王政三年右北平隆基睿宗第三子

以薛稷參知機務

稷以工書事上集覽工書薛稷外祖魏徵家多藏虞於藩邸故為相世南褚遂良所書故銳精臨倣結體道麗遂以書名天下

追削武三思等爵謚暴其尸

書法

嘗書黜封德彝贈謚矣未有書暴其尸者書暴其尸快之也終綱目書削謚二封德彝武

三思書戮棺三漢平帝元始五年發陶共王
母及丁姬冢是年玄宗天寶十二載李林甫

○以姚元之同三品韋嗣立蕭至忠為中書令趙彥昭
崔湜並同平章事○加太平公主實封萬戶

公主沈敏多權畧武后以為類已獨愛幸及誅張易
之公主有力焉中宗之世韋后安樂皆畏之又與太
子共誅韋氏既屢立大功益尊重上嘗與之議政宰
相進退係其一言薦士驟歷清顯者不可勝數權傾
人主其門如市

贈郎岌燕欽融蘇安恒諫議大夫○秋七月贈韋月將

宣州刺史質實

宣州注見漢明帝
永平十三年丹陽

○以崔日用參知機

務○追復故太子重俊位號及敬暉桓彥範崔玄暉張
柬之素恕已李多祚等官爵

太府少卿韋湊上書曰故太子重俊與李多祚等稱
兵入宮中宗登玄武門太子據鞍自若及其徒倒戈
然後逃竄鄉使宿衛不守其為禍也胡可忍言今聖
朝禮葬謚為節愍臣竊惑之若以其誅武三思父子
而嘉之則誅姦臣而尊君父可也今欲自取之是與
三思競為逆也若以其欲廢韋氏而嘉之則韋氏於
時逆狀未彰苟無中宗之命而廢之是脇父廢母也
庸可乎臣恐後之亂臣賊子得引以為比開悖逆之
原非所以彰善癉惡也請改其謚多祚等從重俊興
兵不為無罪今宥之可也名之為雪亦所未安上然
其言而執政以為制命已

集覽

彰善癉惡書畢命文
行但停多祚贈官而已
注癉病也疏云明其

為善當褒賞之病質實韋湊萬年人叔諧玄孫創其為惡當罪罰之質實韋湊萬年人叔諧玄孫創

以宋璟同三品

璟與姚元之協心草中宗弊政進忠良退不肖賞罰盡公請託不行紀綱修舉當時翕然以為復有貞觀之風永徽質實紀綱注見宋營陽王景平二年

崔湜蕭至忠韋嗣立趙彥昭崔日用薛稷罷

日用與稷爭於上前稷曰日用傾側附武三思非忠臣賣友邀功非義士日用曰稷附張易之宗楚客非傾側而何上兩罷之

廢崇恩廟追廢韋后安樂公主為庶人

發明

昏亂之世正邪易位如武韋等求得欲從富貴極矣然轉盼之間禍敗已人屠戮其身廢

黜其號斷棺暴尸猶未足以盡其罪也郎發燕欽融韋月將諸人各贈以官而敬暉等五王追復爵位公道初無終泯之理回視向之炎炎者果安在哉綱目詳書于冊其為斯世勸戒豈不昭昭著明哉也

○八月譙王重福反伏誅

韋后之臨朝也鄭愔貶過均州與譙王重福謀舉兵誅韋氏未發而韋氏敗洛陽人張靈均說重福曰大王地居嫡長當為天子相王雖有功不當立王若潛入洛陽發屯兵殺留守天下指麾可定重福從之時愔左遷過洛陽與靈均結謀聚徒以俟重福重福與靈均詐乘驛入東都縣官馳白留守洛州長史崔日

知帥衆討之重福窘迫赴漕渠溺死愔與靈均皆伏誅初愔附來俊臣得進俊臣誅附張易之易之誅附韋氏韋氏敗又附質實洛陽縣名注見周顯王三年重福竟坐族誅左遷注見漢宣帝元康二年洛州注見秦莊襄王元年三川

書法

於是重福溺死書伏誅何正其罪也

詔以萬騎補外官更置飛騎

萬騎恃功暴橫長安中苦之故有是命

質實

長安縣名注見漢惠帝五年

罷斜封官

用姚元之宋璟及御史大夫畢構之言也所罷凡數千人

發明

是時姚宋諸賢進用政事清明故其設施如此書之冊美可知也

冬十月以薛訥為幽州經畧節度大使質實

薛訥絳州龍門人仁

貴之子幽州注見

高祖武德四年

節度之名自此始

書法

節度之置始此故謹志之

十一月以姚元之為中書令○葬定陵質實

一統志云定陵在西

安府富平縣西北一百十五里龍泉山下又河南府偃師縣宋亦有陵在焉

朝議以韋后有罪不應祔葬乃追謚故英王妃趙氏為和思皇后招魂祔葬范氏曰人之死也魂氣歸于

天形魄歸于地，葬所以藏體魄也。若魂氣則無不之也。苟無體魄，則立廟以祀之而已。魂氣不可得而葬也，而必為之墓，不亦虛乎？

許公蘇瓌卒

制起復瓌子頊為工部侍郎。頊固辭，上使李日知諭旨。日知還奏曰：「臣見其哀毀，不敢發言。」上乃聽其終制。質實，許州名，注見漢後主建興十年。許昌蘇瓌武功人。

十二月以西城隆昌二公主為女官

上以二女為女官，以資天皇天后之福。欲為造觀，諫議大夫竇原悌上疏曰：「釋道二家皆以清淨為本，不當廣營寺觀，勞人費財。又先朝所親狎諸僧，宜加屏斥，補闕宰替否。」上疏曰：「自古失道破國亡家者，口說

不如身逢耳聞不如目見太宗陛下之祖也撥亂反
正開基立極官不虛授財無枉費不多造寺觀而有
福不多度僧尼而無災天地垂祐風雨時若粟帛充
溢蠻夷率服享國久長名高萬古陛下何不取而法
之中宗陛下之兄也棄祖宗之業徇女子之意無能
而祿者數千人無功而封者百餘家造寺不止度人
無窮奪百姓口中之食以養貪殘剝萬人體上之衣
以塗土木人怨神怒衆叛親離享國不永禍及其身
陛下何不懲而改之自頃水旱霜蝗未聞賑恤而為
二女造觀用錢百餘萬緡陛下豈可不計當今之蓄
積有幾中外之經費有幾而輕用百餘萬緡以供無
用之役乎陛下族韋氏之家而不去韋氏之惡忍棄
太宗之法而不忍棄中宗之政乎且陛下當韋氏用
事之時日夕憂危切齒於羣凶今乃不改其所為臣
恐復有切齒於陛下者矣上雖不能從而嘉其切直
二公主後改號金僊玉真公主范氏曰孔子曰生事

之以禮死葬之以禮祭之以禮可謂孝矣未聞以女子為女官而可以資福於其親者也天子之女天下之所取則也不從先王之禮而從方士之言廢人倫蔑典禮罷非法之服奉不享之祠以是為孝非所以率天下也若其可為先王為集覽女官官或作冠謂之矣不待後世始能行也女為道家者流

質實

寧原悌
欽江人

書法

譏也以為孝末矣公主為女官終綱目一書而已

加李朝隱太中大夫

宦者閭興貴以事屬長安令李朝隱朝隱繫之獄上聞之召見朝隱勞之因御承天門集百官宣示朝隱所為且下制稱宦官過寬柔之代必弄威權朕覽前載每所歎息能副朕意實在斯人可加太中大夫賜

中上考

以宋璟為吏部尚書姚元之為兵部尚書

舊制三品以上官冊授五品以上制授六品以下敕授皆委尚書省奏擬文屬吏部武屬兵部中宗之末選舉混淆至是以宋璟為吏部尚書李乂盧從愿為侍郎皆不畏彊禦請謁路絕人服其公以姚元之為兵部尚書陸象先盧懷慎為侍郎武選亦治

集覽

不畏彊禦注見漢

質實

盧從愿范陽人祖六世孫陸象先蘇州人

書法

兵部不書書元之何善其職也

貶祝欽明郭山惲為諸州長史

侍御史倪若水彈奏欽明山憚亂常改作希旨病君
於是左授胡氏曰王者之制行偽而堅言偽而辯學
非而博順非而澤以疑衆殺不以聽焉祝郭二人縱
不誅死尚當盡削官秩投之四裔今雖貶黜而有民
有社夫豈足以示懲哉○時侍御史楊孚彈糾不避
權貴權貴毀之上曰鷹搏狡兔須急救之不爾必反
為所噬御史繩姦慝亦然苟非人

集覽

以疑衆殺此
上五句並禮

主保衛之則亦為姦慝所噬矣
記王制文鄭玄曰皆謂虛華捷給無誠者也不以聽
亦王制文鄭玄曰為其為害大而辭不可明有民有
社注見太宗質實倪若水恒州藁城人四裔
貞觀五年注見新莽始建國元年

姚州蠻反

姚州羣蠻先附吐蕃攝監察御史李知古請發兵擊
之既降築城置州縣重稅之因誅其豪傑掠子女為

奴婢羣蠻怨怒引吐蕃攻集覽姚雋二州姚本滇池
知古殺之由是姚雋路絕國唐置姚州雋古邛

都國漢置越雋郡吐蕃西羌屬名注見太宗貞
唐置雋州雋音髓質實觀八年姚雋二州名姚注見

嗣聖十四年雋注見漢
武帝元鼎六年越雋

辛
睿宗皇帝景雲二年

書法

綱目非元年不書號此二年也其書號何改
元於去年也去年分注嘗細書睿宗皇帝景

雲元年矣此其復大書睿宗皇帝何正始也中宗
裁重茂廢宜立者相王旦也大書睿宗皇帝所以

正其
始也

春正月突厥默啜遣使請和質實

突厥北方國名注見
梁武帝大同十一年

○以郭元振張說同平章事○二月命太子監國以宋王成器為同州刺史幽王守禮為幽州刺史太平公主蒲州安置

初太平公主以太子年少意頗易之既而憚其英武數為流言云太子非長不可立每覘伺其所為纖悉必聞於上與益州長史竇懷貞結黨欲危太子邀韋安石至其第安石固辭不往上嘗密召安石謂曰聞朝廷皆傾心東宮宜察之對曰陛下安得亡國之言此乃太平之謀耳太子有功於社稷仁明孝友天下所知願陛下無惑上瞿然曰朕知之矣卿勿言公主又嘗乘輦邀宰相於光範門內諷以易置東宮衆皆失色宋璟抗言曰東宮有大功於天下真宗廟社稷之主奈何忽有此議與姚元之密言於上曰宋王陛

下之元子。幽王高宗之長孫。公主交構其間。將使東宮不安。請出宋王。幽王皆為刺史。罷岐薛二王左右羽林。太平公主武攸暨皆於東都安置。上曰。朕惟一妹。豈可遠置東都。諸王惟卿所處。頃之上謂侍臣曰。衛者言五日中當有急兵入宮。卿等為朕備之。張說曰。此必姦人欲離間東宮。願陛下早使太子監國。則流言自息矣。元之曰。張說所言社稷之至計也。上悅。以宋王成器為同州刺史。幽王守禮為幽州刺史。太平公主蒲州安置。命太子監國。六品以下官徒以下罪並聽處分。

集覽

流言書蔡氏傳曰。流言無

根之言。如水之流。自彼而至。質實。益州注。見晉武帝此也。瞿然驚視貌。瞿俱遇反。質實。泰始八年東宮注。

見宋文帝元嘉二十七年。幽州注。見漢桓帝延熹五年。岐薛二州名。岐注。見周顯王八年。薛未詳。沿革同。州注。見玄宗開元十一年。陛下注。見漢光武建武二十七年。蒲州注。見周赧王十二年。蒲坂。

書法

於是出二王刺州公主安置命太子監國此其先書監國何重國本也先書監國次書出

成器等則其與於交構明矣

復斜封官

殿中侍御史崔涖言於上曰斜封官皆先帝所除姚元之等建議奪之彰先帝之過為陛下招怨衆口沸騰恐生非常之變太平公主亦以為言上然之制諸斜封官並量材敘用率府參軍柳澤上疏曰斜封官皆因僕妾汲引豈出先帝之意陛下黜之天下稱明一旦收敘何政令之不一也議者皆稱太平公主誑誤陛下積小成大為禍不細上弗聽胡氏曰彰先帝之惡為陛下招怨姦人之言類如此使遇明君必曰置先帝於過舉豈所以為孝沽美譽於羣小豈所以為君爾以桓靈待我則姦言無自入矣然姚宋秉政

而此說得行何哉睿宗以六居五使太平陰疑於陽
是以此姚宗若力爭之勢將有激矣然則是乎曰
當其時事有大於**集覽**率府率所類反或音朔律反
此者姑忍焉可也

集覽

唐置左右衛率府掌東宮禁

衛之法太子出入則率其屬於牙門之左右以為捍
守汲引薦導也漢書注顏師古曰言如井中汲水引
之而升也以六居五六陰數九陽數也二臣位五君
位也以六居五言以柔而居君位也易坤卦六五黃
裳元吉伊川傳曰坤雖臣道五實君位故為之戒黃
裳既元吉則居尊為天下大凶可知也五尊位也在
他卦六居五或為柔順或為文明或為暗弱在坤則
為居尊位陰者臣道也婦道也臣居尊位羿莽是也
猶可言也使太平陰疑於陽謂致使太平公主不守分
也易坤卦陰疑於陽必戰伊川傳曰陽大陰小陰必
從陽陰既盛極與陽偕矣是疑於陽也不相從則必

戰陰與陽戰則陰陽皆傷也朱氏本質實柳澤
義曰疑謂均敵而無小大之差也解人

發明

即睿宗唐之賢主側觀其恬淡寡慾黃屋非心
來未之有也然未幾太平撓政弊倖復生於是斜
封首復而紀綱漸紊蓋帝之清簡有餘而明斷不
足是以其弊至於此爾嗚呼以睿宗之清淨簡寡
而猶不免此况汨沒於嗜慾者乎綱目於前書罷
斜封官於後書復斜封官則當時
治亂得失輔相賢否皆可知矣

貶姚元之為申州刺史宋璟為楚州刺史寢二王刺史

之命質實

申州注見梁武帝太清二年義陽楚
州注見宋孝武帝大明三年山陽

太平公主聞姚元之宋璟之謀大怒以讓
太子太子懼奏二人離間姑兄故有是命

劉幽求罷。○以左右萬騎羽林為北門四軍。○以韋安石為中書令。李日知為侍中。

安石日知為政紀綱不紊
亂復為景龍之世矣

夏四月制政事皆取太子處分

上召三品以上謂曰朕素懷淡泊不以萬乘為貴今欲傳位太子何如羣臣莫對殿中侍御史和逢堯太平公主之黨也言於上曰陛下春秋未高方為四海所依仰豈得遽爾上乃止制凡政事皆取太子處分軍旅死刑及五品質實萬乘注見秦始皇二十六年除授議定以聞和逢堯岐州岐山人軍旅注見梁武帝中大通二年

五月召太平公主還京師

太子請之也

復吳陵順陵質實

吳陵順陵注見中宗景龍元年

太平公主為武攸暨請之也

以薛謙光為岐州刺史

僧慧範恃太平公主勢逼奪民田御史大夫薛謙光彈之公主訴於上出之

質實

岐州注見周顯

王八年薛謙光汾陰人

六月置十道按察使

時遣使按察十道分山南為東西兩道分隴右為河西道又分天下置二十四都督各糾察所部刺史以
下善惡太子右庶子李景伯舍人盧備等上言都督
專殺生之柄權任太重或用非其人為害不細今御
史秩卑望重以時巡察姦宄自禁
其後竟罷都督但置按察使而已

書法

按察使之
名始此

秋七月追復上官氏為昭容

初昭容從母之子王昱說昭容母鄭氏曰武氏天之
所廢婕妤好附之滅族之道也鄭氏以戒昭容昭容弗
聽及重俊誅三思索昭容昭容始懼思昱言自是心
附帝室故中宗崩草遺制以相王輔政及隆基入宮
又帥宮人迎之劉幽求為之言隆基
不許遂斬之至是復追謚曰惠文

書法

昭容爾書追復何予徙義也昭容自重俊叩閣之後心附帝室臨淄殺之為不恕矣於是

特書所以

勸徙義也

以韋安石為左僕射同三品

太平公主以安石不附已故崇以虛名實去其權也

九月以竇懷貞為侍中

懷貞每退朝必詣太平公主第時修金僊玉質實金真二觀羣臣多諫懷貞獨勸成之身自督役

玉真二觀未詳處所

冬十月韋安石郭元振竇懷貞李日知張說罷以劉幽

求魏知古崔湜並同三品陸象先同平章事

上御承天門引韋安石等宣制責以政教多闕水旱為災輔佐非才並罷政事以劉幽求等同三品象先同平章事皆太平公主之志也象先清慎寡言論高遠為時人所重湜私侍太平公主欲引為相湜請與象先同升上不欲用質實魏知古湜公主涕泣以請乃從之

質實
魏知古深州人

遣御史中丞和逢堯使突厥

逢堯說默啜曰處密堅昆聞可汗結昏於唐皆當歸附何不罷唐冠帶使之聞之默啜許諾明日幞頭紫衫再拜

集覽

處密注見高宗永徽二年堅昆注見漢書

稱臣

宣帝黃龍元年幞頭幞防玉反字亦作

幘本幘巾故用全幅帛向後幘髮謂之幘頭二儀寶錄云古以皂羅三尺裹頭號頭巾至周武帝依古三

尺裁為幞頭唐馬周交解為之夢溪筆談曰唐惟質人主用硬脚一云梁高祖始布漆于紗施鐵為脚質

實

突厥北狄種名注見梁武帝大同十一年

十一月令百姓二十五入軍五十五免○召司馬承禎

至京師尋許還山

陰陽術數道士且不屑為況人主日御萬幾何暇及此詹宗之問為失言矣承禎應對確有至理固請還山尤見高致

上召天台道士司馬承禎問以陰陽數術對曰道者損之又損以至於無為安肯勞心以學數術乎上曰理身無為則高矣如理國何對曰國猶身也順物自然而心無所私則天下理矣上歎曰廣成之言無以過也承禎固請還山上許之尚書左丞盧藏用指終南山謂承禎曰此中大有佳處何必天台承禎曰以愚觀之此乃仕宦之疾徑耳藏用嘗隱集覽廣成莊終南則天時徵為左拾遺故承禎言之

篇廣成子居崆峒之上黃帝往訪之問至道焉陸德明曰廣成子或云即老子別號葛稚川曰老子無世不出數易姓名初出於上三皇時號玄中法師出於下三皇時號金闕帝君出黃帝時號力默子又號廣成子出周文王時為守藏史號支邑先生出周武王時為柱下史號郭叔子出於漢初號黃石公出於漢文帝時號河上公終南山地理志扶風郡有武功縣縣東有太一山古文以為終南括地志云終南一名中南一名太乙一名橘山一名周南一名地肺四皓以漢高慢士共入商洛山漢高徵之不來遂隱此山福地記云終南東接驪山太華西連太白隴山北去長安八十里南入楚塞連蜀東西數百里仕宦之疾徑新史作捷徑杜詩捷徑應未忍注杜修可曰張衡應間曰捷徑邪至我不忍投步干進苟容我不忍歛肩又杜詩薄劣慙真隱注師尹曰隱有真有假如杜淹之隱嵩山徵求利祿此所謂仕塗之捷徑耳即此

質實

一統志云天台山名在台州府天台縣西一百

一十里道書是山上應台星起然秀出有八重

視之如一帆高一萬八千大周迴八百里山去天不

遠路由福溪水險而清前有石橋廣不盈尺長數十

丈下臨絕澗惟忘其身然後能濟濟者梯巖壁援藤

葛始得平路見天台山蔚然奇秀雙列於青霄上有

瓊樓玉闕天堂碧林醴泉僊物畢具也司馬承禎隱

居桐栢山構層軒於壇上號白雲子唐則天時屢召

不起睿宗延問治身治國之術答以為道日損與物

自然之言睿宗嘉歎欲加寵位固辭而歸先期告終

忽若蟬蛻弟子斂空衣葬之廣成子軒轅時人隱居

崆峒山石室中黃帝造焉問以至道之要答曰至道

之精窈窕冥冥至道之極昏昏默默無視無聽抱神

以靜形將自正必靜必清毋勞爾形毋搖爾精毋俾

爾思思慮營營乃可長生慎內閉外多智我敗我守

其一而處其和故我千二百年未嘗衰老終南山注

見晉元帝
太興四年

書法

史崇恩書道士承禎道士也。不書何承禎有道者何。以書道士為迎之書也。

壬子太極元年

玄宗皇帝
先天元年

春正月祀南郊

初用諫議大夫賈曾議合祭天地

集覽

合祭天地合閭曷反。賈曾議虞夏之時禘於郊則地祇羣

望皆合於圜丘以始祖配

書法

自此以後天地又合祭

竇懷貞岑義同三品考異

竇上漏以字

○以蕭至忠為刑部

尚書

蕭至忠自託於太平公主引為尚書華州長史
蔣欽緒其妹夫也謂之曰如子之才何憂不達勿為
非分妄求至忠不應欽緒退而歎曰九代卿族一舉
滅之可哀也哉至忠素有雅望嘗自公主第門出遇
宋璟璟曰非所望於蕭君也至忠質實華州注見玄
笑曰善乎宋生之言遽策馬而去
質實宗開元十一
年尚書官名注見
晉惠帝永興二年

書法

唐世之禍恒在女子武韋可鑒矣睿宗自景
雲二年以來綱目所書二十二事為公主而

設者十二焉書蒲州安置之後書復斜封官公主
之言也貶姚宋公主之怒也制政事皆取太子處
分則帝欲傳位公主沮之也書召還京師之後書
復吳陵順陵公主之請也出薛謙光公主之訴也

奪安石權公主之所憾也再遷竇懷貞公主之黨也罷安石等相幽求崔湜象先皆公主之志也蕭至忠為尚書公主之所引也朝廷大政惟公主是從使非早授大位其不為中宗者幾希矣故綱目特詳之

夏五月祭北郊○六月以岑義為侍中○幽州大都督

孫佺襲奚敗沒

薛訥鎮幽州二十餘年吏民安之未嘗舉兵出塞敵亦不敢犯與燕州刺史李瑱有隙瑱毀之於劉幽求幽求以左羽林將軍孫佺代之孫佺至州帥兵二萬騎八千以襲奚契丹將軍烏可利諫曰道險天熱懸軍遠襲非計也佺曰薛訥在邊積年竟不能為國家復營州今乘其無備往必有功遂行遇奚騎八千戰

于冷陁大敗為敵所擒
集覽 猓奚句絕猓掩其不備
獻於突厥默啜殺之也奚之先東徽宇文之

別族本號庫莫奚至隋始去庫莫而但曰奚後為契
丹所併以奚王牙帳所居建城號中京中京東過小

河唱叫山由古北口至中京皆奚境也契丹志云奚
地居上東燕三京之中西臨馬孟山六十里其山南

北千里東西八百里連亘燕京西山契丹注見
晉安帝義熙二年冷陁契丹中山在營州北 **正誤**

孫佺帥兵二萬騎八千以襲奚契丹將軍烏可利諫
今按當連下文契丹為句唐謂奚與契丹為兩蕃肅

宗實錄安祿山云大夫不欲滅奚契丹兩蕃邪又玄
宗時信安王禕擊奚契丹烏承玘曰二蕃勁敵也通

鑑前後書奚契丹甚多或以為一虜 **質實** 幽州注見
者非烏可利乃唐官非契丹將軍也高祖武德

四年營州注見晉武帝太康二年
昌黎燕州注見高祖武德九年

秋七月彗星出西方入太微質實

彗星注見周顯王八年太微注見漢景帝

後三
年 ○以竇懷貞為左僕射平章軍國重事

有相者謂同三品竇懷貞曰公有刑厄懷貞懼質實請解官為安國寺奴敕聽之尋復以為左僕射

一統志云安國寺在河南府治南

八月帝傳位於太子太子即位尊帝為太上皇考證當作

皇太子隆基即位

太平公主使術者言於上曰彗所以除舊布新又帝座及心前星皆有變皇太子當為天子上曰傳德避災吾志決矣公主及其黨皆以為不可太子聞之固辭上曰汝為孝子何必待柩前然後即位邪太子流

涕而出制傳位於太子太子又上表辭太平公主勸
上自總大政上乃謂太子曰汝以天下事重欲朕兼
理之邪昔舜禪禹猶親巡狩朕雖傳位豈忘家國其
軍國大事當無省之玄宗即位尊睿宗為太上皇上
皇自稱曰朕命曰誥五日一受朝於太極殿皇帝自
稱曰予命曰制敕日受朝於武德殿三品以上除授
及大刑政乃奏上皇決之大赦改元胡氏曰睿宗之
於中宗未有以甚相遠也使無玄宗繼其後而在位
日久亦同歸**集覽**帝座及心前星帝座注見隋煬帝
乎亂而已矣**集覽**大業十三年心注見漢成帝綏和
二年**質實**巡狩注見隋煬帝大業六年太極殿注見
太宗貞觀二十七年武德殿未詳處所

書法

彗星之變高湛嘗書傳位太子矣梁乙酉年
於是復見綱目上書傳位下書即位正也太

宗肅宗皆不得與於此後此其惟憲宗乎然星變
一也高湛傳位而齊以亡睿宗傳位而唐以安所

謂吉凶由人矣終綱目書傳
國傳位七詳周赧王十六年

發明

唐朝傳位於子者四君然而書法則不同在
太宗則直書太子即位肅宗則書太子即

位於靈武惟睿宗順宗書帝傳位於太子蓋此二
君制命在已出於由衷而彼二君則幾於篡矣此
綱目所以不得不
不各書其實也

立妃王氏為皇后○以劉幽求為僕射同三品魏知古

為侍中崔湜為中書令質實

僕射官名注見秦
始皇三十四年

○沅劉

幽求於封州

初河內人王琚預於王同皎之謀上之為太子也琚
至長安見上至廷中故徐行宦者曰殿下在簾內琚

曰何謂殿下今獨有太平公主耳上遽召見與語琚曰韋庶人弑逆人心不服誅之易耳太平公主凶猾

無比大臣多為之用琚竊憂之上引與同榻坐泣曰主上同氣唯有太平言之恐傷主上之意不言為患

日深為之奈何琚曰天子之孝當以安宗廟社稷為事豈顧小節上悅及即位以為中書侍郎是時宰相

多太平公主之黨劉幽求與羽林將軍張暉謀使言於上曰竇懷貞崔湜岑義皆因公主得進日夜為謀

不軌若不早圖一旦事起太上皇何以得安請速誅之上以為然暉洩其謀上大懼遽列上其狀有司奏

流幽求於封州張暉於豐州初崔湜坐與譙王重福通書當死張說與幽求營護得免既而湜附太平公

主謀罷說政事及幽求得罪湜諷廣州都督周利貞使殺之桂州都督王昉知其謀留幽求不遣由是得

免質實

河內縣名注見周赧王五十三年野王封州注見隋文帝仁壽元年成州豐州注見漢宣

帝甘露二年五原塞桂州注見秦始皇
三十三年桂林王暉相州人寬之曾孫

九月朔日食質實

日食注見新莽天鳳元年

○冬十月沙陁金山遣

使入貢

沙陁處月之別集覽

沙陁金山處月之別種西突厥種也姓朱邪氏之苗裔本號朱邪世居金娑山

之陽蒲類海之東其地有大磧名曰沙陁後因以沙陁為號以朱邪為姓至唐憲宗時有朱邪盡忠始見於中國其後有朱邪赤心懿宗時賜姓李名國昌克用其子也邪移遮反處月西域國本西突厥之別部

十二月刑部尚書李日知致仕

日知在官不待捶撻而事集刑部有令史受敕三日忘不行日知怒欲捶之既而謂曰我欲捶汝天下人

必謂汝能撿李日知嗔受李日知杖不得比於人
妻子亦將棄汝矣遂釋之吏皆感悅無敢犯者

癸丑
玄宗明皇帝開元元年春正月詔衛士二十五入軍

五十而免○以蕭至忠為中書令○二月御樓觀燈大

酺

開門然燈大酺合樂上皇與上御門樓臨觀以夜繼
晝凡月餘左拾遺嚴挺之上疏諫以為酺者因人所
利合釀為歡今乃損萬人之力營百戲之資非所以
光聖德美風化也敕以挺之忠直宣示百官厚賞之
晉陵尉楊相如上疏曰隋氏以縱欲而亡太宗以抑
欲而昌人主不可不慎擇也夫人主莫不好忠正而
惡佞邪然忠正者常疎佞邪者常親以至於覆國危
身而不悟何哉忠正者多忤意佞邪者多順指積忤

生憎積順生愛此親疎之所以分也誠能愛其忤以收忠賢惡其順以去佞邪則太宗之業將何遠哉夫法貴簡而能禁罰貴輕而必行小過不察則無煩苛大罪不漏則止姦逆使簡而難犯寬而能制則善矣上覽而集覽大酺服虔曰酺音蒲顏師古曰服音是善之酺布也王德布大飲酒也文穎曰漢律

三人已上無故羣飲罰金四兩故賜酺得會聚飲食也唐無酺禁令亦賜酺者蓋聚作伎樂高年賜酒麪合樂合如字又音閤合音閤醪極虐反會錢飲酒也百戲漢書天子饗四夷之客作巴俞都盧海中碣極漫衍魚龍角抵之戲以觀視之質實晉陵縣名蓋若此雜變不一陳之故名百戲注見隋煬

帝大業十三年毘陵

癸明玄宗初政首書御樓觀燈殆與中宗無異何哉是時睿宗在上猶總大權而太平煒惑其

間玄宗未免曲意奉承是以嬉戲為樂有此舉爾直筆書之亦可歎也

以高麗大祚榮為勃海郡王

初高麗既亡其別種大祚榮徙居營州阻險自固武后使將軍李楷固討之大敗祚榮遂東據東牟山高麗靺鞨之人稍稍歸之地方二千里户十餘萬勝兵數萬人附于突厥中宗時遣子入侍至是以為勃海郡王

集覽

大祚榮祚榮姓大氏

質實

高麗東方國名注見漢武帝元封二

年朝鮮東牟山未詳處所靺鞨北方國名注見隋文帝開皇十八年突厥北方國名注見梁武帝大同十一年勃海郡注見晉成帝咸康六年挹婁

夏五月罷修大明宮

修大明宮未畢敕質實大明宮注見太宗貞觀八年以農務方勤罷之

書法

太宗再罷修洛陽宮不書罷此其書罷修何美之也於是修宮未畢上以農務方勤特敕

罷之可謂有愛民之誠矣故特書而美之終綱目宮室書罷者三漢明帝永平三年是年敬宗寶歷

元年皆

美辭也

六月以郭元振同三品○秋七月太平公主謀逆賜死蕭至忠岑義實懷貞崔湜伏誅

太平公主依上皇之勢擅權用事宰相七人五出其門文武之臣大半附之與實懷貞岑義蕭至忠崔湜薛稷僧慧範等謀廢立又與宮人元氏謀於赤箭粉中寘毒以進中書侍郎王琚言於上曰事迫矣不可

不速發左丞張說自東都遣人遺上佩刀荊州長史崔日用入奏事言於上曰太平謀逆有日陛下往在東宮猶為臣子若欲討之須用謀力今但下一制書誰敢不從萬一姦宄得志悔之何及上曰誠如卿言直恐驚動上皇日用曰天子之孝在於安四海若姦人得志則社稷為墟安在其為孝乎請先定北軍後收逆黨則不驚上皇矣上以為然乃與岐王範薛王業郭元振王毛仲姜皎李令問王守一及內給事高力士等定計以兵三百餘人入虔化門召至忠義斬之懷貞自縊死戮其尸上皇聞變登承天門樓郭元振奏皇帝前奉誥誅竇懷貞等無他也上皇乃下誥自今軍國政刑一取皇帝處分徙居百福殿太平公主賜死諸子及黨與死者數十人崔湜與右丞盧藏用俱坐私侍公主流嶺南尋以湜與逆謀追賜死初太平公主與湜等謀廢立陸象先獨以為不可公主曰廢長立少已為不順且又失德若之何不去象先

曰既以功立當以罪廢今實無罪象先終不敢從上
既誅懷貞等召象先謂曰歲寒知松栢信哉時窮治
公主枝黨象先密為申理所全

集覽

僧慧範僧浮屠道人慧範其名

甚多然未嘗自言時無知者

赤箭粉

赤箭草部藥名研為粉而服之味辛溫主殺

鬼精物蠱毒惡氣消癰腫久服益氣力長陰肥健陶

隱居云赤箭草亦是芝類莖赤如箭葉甚端根如

人足又云如芋有十二子為衛有風不動無風自搖

如此亦非俗所見圖經曰赤箭實似苦楝子核作五

六稜中有肉如麴前奉詔上皇之命曰詔謂皇帝先

前曾承此詔命湜與湜示力反與讀

與預同枝黨注見中宗嗣聖七年

正誤

湜與逆謀今按此處

有兩湜與字上文崔湜與右

質實

荊州注見漢獻帝

丞盧藏用云云與字則上聲

社稷注見新莽天鳳元年王毛仲高麗人高力士高

州人馮盎曾孫中人高延福養為子故冒其姓姜皎

人上邽

書法

上書公主謀逆賜死下書四人伏誅則四人為公主之黨明矣綱目書公主反逆誅死者

四漢鄂邑唐高陽太平惟安樂以韋后黨書其黨

以高力士為右監門將軍知內侍省事考證

當加宦者於高力士

上○謹按凡例曰宦者除拜當書者皆加宦者字註云以著刑人與政之屬夫刑人用權莫盛於唐尊為上皇以兵劫之貴為天子以父呼之甚至弑君弑后豈特與政而已哉追原其自始於高力士盛於李輔國而極於劉季述皆由諸帝狎近便嬖授以國命而不可奪此非用權者之過用之以權者之過也今故推本正例自高力士至韓全誨十有餘人拜官之始皆加宦者於名氏之上若張承業死則綱目特筆書曰唐特進河東監軍

使張承業卒是時唐已亡
猶冠以唐號表其忠賢云

初太宗定制內侍省不置三品官黃衣廩食守門傳
命而已中宗時七品以上至千餘人然衣緋者尚寡
上在藩邸力士傾心奉之及為太子奏為內給事至
是以誅蕭岑功賞之是後宦官增至三千人除三品
將軍者寢多宦官之盛自此始范氏曰國家之敗未
有不由子孫廢祖宗之業也創業之君得之難故其
防患深慮之遠故其立法密後世子孫雖有聰明才
智高出羣臣之表然未若祖宗更事之多也夫中人
不可假以威權蓋近而易以為姦也明皇不戒履霜
堅冰而輕變太宗之制崇寵宦者增多其員自是以
後寢干國政末流之禍蓋基於此書曰監于質實
先王成憲其永無愆為人後嗣可不念之哉
謂蕭至忠岑義履霜
堅冰易坤初六爻辭

書法

呂強不書宦者賢之也漢靈帝光和二年此其不書何唐世宦者例不書也例不書也者

不勝書也然則曷為書為將軍譏也唐初內侍省不置三品官中宗時亦鮮有衣緋者力士為將軍而宦官自此盛矣書為將軍著唐世之禍始也

發明

漢竇憲之誅鄭眾實預其謀和帝寵以封爵遂為東都不救之禍唐太平公主之誅高力

士亦出入其間玄宗畀以重任迄為唐室膏肓之疾其端甚微其禍甚大綱目詳而書之所以著唐人禍亂之本蓋自此始有天下國家者可不鑒哉

以張說為中書令○陸象先罷○八月以劉幽求為左

僕射平章軍國大事○九月以李暢為虔州刺史

初中宗之崩也李嶠密表韋后請出相王諸子於外
上即位於禁中得其表或請誅之張說曰嶠雖不識
逆順然為當時之謀則忠矣上然之以
嶠子暢為虔州刺史令嶠隨暢之官
州注見梁簡文帝
大寶元年南康

罷諸道按察使○冬十月引見京畿縣令

引見京畿縣令戒質實
京畿注見太
以惠養黎元之意
宗貞觀五年

講武於驪山

上幸新豐講武於驪山之下徵兵二十萬以軍容不
整坐兵部尚書郭元振於纛下將斬之劉幽求張說
諫曰元振有大功於社稷不可殺乃流新州而斬給
事中知禮儀事唐紹上始欲立威亦無殺紹之意將

軍李邕遽宣敕斬之上尋罷邕官廢棄終身時二大臣得罪諸軍震懾失次惟薛訥解琬二軍不動上遣輕騎召之皆不得入集覽蠹音道又音毒軍中大皂其陳上深歎美之旗名二儀實錄云蠹皂繒為之似虫質實新豐縣名注見漢成帝鴻嘉元年驪尤之首山注見秦始皇三十七年郭元振魏州人新州注見梁武帝大同七年

書法

書講武何譏也何譏黷武且淫刑帝兩失之矣終綱目書講武三詳漢靈帝中平五年書

大閱二詳晉成帝咸康六年皆譏也舍是無書者矣

以姚元之同三品

上欲以姚元之為相張說疾之使御史大夫趙彥昭彈之上不納又使殿中監姜皎言於上曰陛下常欲

擇河東總管而難其人臣今得之矣問為誰皎曰元之文武全才真其人也上曰此張說之意汝何得面欺皎叩頭首服即召元之詣行在拜以為相元之吏事明敏三為宰相皆無兵部尚書緣邊屯戍斥堠士馬儲械無不默記上勵精為治每事訪之應答如響同僚唯諾而已元之請抑權倖愛爵賞納諫諍却貢獻不與羣臣褻狎上皆納之元之嘗奏請序進郎吏上仰視殿屋再三言之終不應元之懼趨出罷朝高力士諫曰陛下新總萬幾宰臣奏事當面加可否奈何一不省察上曰朕任元之以庶政大事當奏聞共議之即吏早秩乃以煩朕邪聞者皆服上識人君之體張九齡以元之有重望為上所信任奏記勸其遠諂躁進純厚畧曰任人當才為政大體與之共理無出此途向之用人非無知人之鑒其所以失溺在緣情之舉今君侯登用未幾而淺中弱植之徒已延頸企踵而至諂親戚以求譽媚賓客以取容豈不有才

所失在於無恥元之納其言新興王晉坐太平公主
逆黨伏誅僚吏皆奔散惟司功李撫步從不失在官
之禮仍哭其尸元之曰藥

集覽

失溺在緣情之舉失
過也溺乃力反感也

布之儔也擢為尚書郎
言舉人之失在於因緣私情耳淺中猶言狹中淺謀
也弱植左傳襄三十年其君弱植注其君之忠弱於
樹立延頸企踵注見高祖武德四年李撫姓名撫呼
為反藥布之儔漢高時藥布為梁王彭越大夫越反
梟首洛陽詔收視越者輒捕之時布使於齊

正誤

其所

還奏事頭下祠而哭之漢高乃拜為都尉
以失溺在緣情之舉今按

質實

行在注見晉惠帝永
興元年斤瑛注見漢

當以其所以失四字為句
武帝元封元年張九齡曲江人新興注見梁武帝大
同七年新州藥布梁人彭越為家人時嘗與布遊及
越為梁王請布為大夫越被誅布祠而哭之漢高帝
欲烹布布請就烹帝壯其義拜為都尉後以功封鄒

侯

發明

人君之德莫大於明明則其臣不能欺玄宗欲相姚崇而張說疾之既彈以趙彥昭而明

皇不納亦可已矣又使姜皎曲為之說非明皇灼見其姦寧不墮其計中夫如是則羣臣何所容其欺乎書以姚元之同三品文無美詞而美固在其中矣

十一月羣臣請加尊號

書法

尊號前乎未有也自高宗武后始玄宗始清帝室治象一新而臣下猶踵前弊綱目書羣

臣請譏

諛也

○命中書侍郎王珣行邊

中書侍郎王琚為上所親厚羣臣莫及或言於上曰
琚權譎縱橫之才可與之定禍亂難與之守承平上
由是浸疎之使集覽縱橫縱亦作從注見周安王十
按行北邊諸軍五年按行謂至北邊有所按察
也行音
下孟反

十二月改官名

僕射為丞相中書為紫微省門下為黃門省侍中為
監雍州為京兆府洛州為河南府長史為尹司馬為
少尹質實雍州注見開元十一年京兆洛
州注見秦莊襄王元年三川

以姚崇為紫微令張說為相州刺史

元之避開元尊號復名崇崇既為相張說懼乃潛詣
岐王申款他日崇對於便殿行微蹇上問有足疾乎

對曰臣有腹心之疾非足疾也上問其故對曰岐王
陛下愛弟張說為輔臣而密乘車入王家恐為所誤
故憂之遂左遷集覽岐王質實岐州名注見周顯王
說為相州刺史名範八年相州注見漢元
帝建昭二年魏郡左遷
注見漢宣帝元康二年

劉幽求罷以盧懷慎同平章事

御批資治通鑑綱目卷四十二下

謹案第七頁後一行於牛頭朝那山北按朝那山
元和郡縣志作牟那山

第二十五頁前一行天寶十二載刊本載訛年據
帝紀改

第三十八頁後四行縣東有太一山刊本脫一字
據漢書增又按潘岳西征賦李善注云漢書武
功縣有太一古文以為終南此賦下云太一明
與終南別山西京賦云于前則終南太一二山

明矣





總校官庶吉士臣張能照

校對官檢討臣郭寅

謄錄監生臣劉書